

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**Z A K O N**

**O IZMJENAMA I DOPUNAMA ZAKONA O FEDERALNIM MINISTARSTVIMA I DRUGIM  
TIJELIMA FEDERALNE UPRAVE**

**Sarajevo, juni 2013. godine**

## **PRIJEDLOG ZA DONOŠENJE ZAKONA PO SKRAĆENOM POSTUPKU**

Predlažemo donošenje Zakona o izmjenama i dopunama Zakona o federalnim ministarstvima i drugim tijelima federalne uprave po skraćenom postupku i ističemo da se u konkretnom slučaju ne radi o složenom i obimnom zakonu te da su u tom smislu ispunjeni uslovi iz člana 172. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i člana 164. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH" br. 27/03 i 21/09).

# ZAKON

## O IZMJENAMA I DOPUNAMA ZAKONA O FEDERALNIM MINISTARSTVIMA I DRUGIM TIJELIMA FEDERALNE UPRAVE

### Član 1.

U Zakonu o federalnim ministarstvima i drugim tijelima federalne uprave ("Službene novine Federacije BiH", br. 58/02, 19/03, 38/05, 2/06, 8/06, 61/06, 52/09 i 48/11), u članu 4. tačka 11. mijenja se i glasi:

„11. Federalno ministarstvo kulture, sporta i mladih,“.

### Član 2.

U članu 9. stav 2., riječi: „Zavod za mjeriteljstvo i „ brišu se.

Stav 3. briše se.

Dosadašnji stav 4. postaje stav 3.

### Član 3.

U članu 10. stav 2. Riječi: „i Federalna direkcija za izgradnju, upravljanje i održavanje autocesta.“, brišu se.

Stav 4. briše se.

### Član 4.

U članu 13. stav 1. mijenja se i glasi:

„Federalno ministarstvo za pitanja boraca i invalida odbrambeno - oslobodilačkog rata/ Federalno ministarstvo za pitanja branitelja i invalida domovinskog rata vrši upravne, stručne i druge poslove utvrđene zakonom koji se odnose na: utvrđivanje jedinstvene politke i pripremanje sistemskih propisa kojim se reguliraju osnovna socijalno - statusna pitanja vojnih invalida, porodica poginulih boraca i nezaposlenih boraca i boraca drugih oslobodilačkih ratova i učesnika oslobodilačkih pokreta i zaštitu ratnih i mirnodopskih vojnih invalida, zaštitu članova porodica poginulih, nestalih i umrlih boraca, kao i umrlih ratnih vojnih invalida; poslove vojnih evidencija; upravni i finansijski i nadzor izvršavanja zakona i drugih propisa iz oblasti boračko - invalidske zaštite u skladu sa Ustavom i zakonima; postupanje po pravosnažnim presudama zbog povrede prava iz radno-pravnog odnosa bivših pripadnika Vojske Federacije i Federalnog ministarstva odbrane; upravno rješavanje po presudama donesenim u sporovima iz radno-pravnih odnosa bivših pripadnika Vojske Federacije i Federalnog ministarstva odbrane i druga pitanja koja se odnose na prava i obaveze bivših pripadnika Vojske Federacije i Federalnog ministarstva odbrane; daje mišljenja na propise koje pripremaju drugi organi, a odnose se na socijalno - statusna prava navedenih kategorija; osiguravanje sredstava za finansiranje prava navedenih

kategorija propisanih federalnim zakonima i drugim federalnim propisima; utvrđuje načine isplate i usklađivanje mjesečnih novčanih primanja; pomaže izgradnju, uređenje i održavanje spomen obilježja, grobalja boraca i stratišta nevinih žrtava; kontrolu namjenskog trošenja sredstava i vođenje propisanih evidencija iz nadležnosti ovog ministarstva“.

## **Član 5.**

U članu 16. stav 1. mijenja se i glasi:

„Federalno ministarstvo kulture, sporta i mladih obavlja upravne, stručne i druge poslove iz nadležnosti Federacije koji se odnose na koordinaciju u: naučno - istraživačkoj djelatnosti iz oblasti zaštite i korištenja kulturno - historijskog nasljeđa; muzejskoj, arhivskoj, bibliotekarskoj, izdavačkoj, pozorišnoj, likovnoj, muzičkoj i filmskoj djelatnosti; sportu; saradnji i koordinaciji zadataka u vezi sa mladima; djelatnosti ustanova, udruženja, fondacija i drugih pravnih lica u oblasti kulture, sporta i mladih; unapređivanju djelatnosti u oblasti kulture, sporta i mladih i druge poslove utvrđene Zakonom.“

U stavu 2. riječi: „Federalnog ministarstva kulture i sporta“ zamjenjuju se riječima: „Federalnog ministarstva kulture, sporta i mladih“.

## **Član 6.**

U članu 18. dodaju se novi st. 2.i 3. koji glase:

„U sastavu Federalnog ministarstva prostornog uređenja nalazi se Zavod za prostorno planiranje Federacije Bosne i Hercegovine.

Zavod za prostorno planiranje Federacije Bosne i Hercegovine vrši stručno-analitičke poslove iz oblasti prostornog planiranja i uređenja prostora Federacije; izrađuje planske dokumente, čuva i stavlja na stalni i javni uvid planove prostornog uređenja; izrađuje stručne podloge za izvještaje o stanju u prostoru, stručne podloge za Program mjera i za ocjenu usklađenosti planskih dokumenata kantona sa planom višeg reda; daje stručna mišljenja i informacije u postupku izdavanja prostorno –planske dokumentacije; vodi jedinstveni informacioni sistem prostornih podataka u Federaciji, te vrši i druge stručne poslove utvrđene Zakonom i drugim propisima.“.

## **Član 7.**

U članu 24. iza tačke 9.dodaje se nova tačka 10., koja glasi:  
„ 10. Federalni zavod za mjeriteljstvo.“

## **Član 8.**

Iza člana 29 d., dodaje se novi član 29 e. , koji glasi:

### **„Član 29 e.**

Federalni zavod za mjeriteljstvo vrši stručne i organizacione poslove iz oblasti mjeriteljstva u Federaciji; donosi tehničke propise o verifikaciji mjerila; vrši ispitivanje i verifikaciju mjerila; osniva odgovarajuće centre za verifikaciju i nadzor mjerila; učestvuje u ostvarivanju , čuvanju, održavanju i upotrebi etalona i referentnih materijala, vodi odgovarajuće registre na području Federacije; vrši mjeriteljski nadzor nad upotrebom mjerila i označavanjem pakovanih proizvoda, vrši neposrednu kontrolu predmeta od plemenitih metala i njihovo žigosanje; sarađuje sa odgovarajućim institucijama u Bosni i Hercegovini i obavlja druge poslove iz oblasti mjeriteljstva koji nisu u nadležnosti institucija Bosne i Hercegovine.“

#### **Član 9.**

U članu 30. stav 2. iza alineje 6. dodaje se nova alineja 7. koja glasi :  
„ - Federalni zavod za mjeriteljstvo“.

#### **Član 10.**

Ovaj zakon stupa na snagu osmog dana od dana objavljivanja u „Službenim novinama Federacije BiH“.

# O B R A Z L O Ź E N J E

## ZAKONA O IZMJENAMA I DOPUNAMA ZAKONA O FEDERALNIM MINISTARSTVIMA I DRUGIM TIJELIMA FEDERALNE UPRAVE

### I. - USTAVNI OSNOV

Ustavni osnov za donošenje ovog zakona sadržan je u odredbi člana IV. A. 20. (1) d) Ustava Federacije Bosne i Hercegovine, gdje je propisano da Parlament Federacije Bosne i Hercegovine donosi zakone o vršenju funkcija federalne vlasti.

### II. - RAZLOZI ZA DONOŠENJE

Razlozi za donošenje ovog zakona sastoje se u velikom broju inicijativa za izmjene Zakona o federalnim ministarstvima i drugim tijelima federalne uprave ("Službene novine Federacije BiH", br. 58/02, 19/03, 38/05, 2/06, 8/06, 61/06, 52/09 i 48/11) koje su Federalnom ministarstvu pravde dostavili drugi federalni organi uprave.

### III. - OBRAZLOŽENJE PRAVNIH RJEŠENJA

**Odredbom člana 1.** je propisano da se u članu 4. tačka 11. mijenja i glasi: „11. Federalno ministarstvo kulture, sporta i mladih“. Ova izmjena je proistekla iz Inicijative Federalnog ministarstva kulture i sporta a u kojoj je navedeno „da je ova izmjena obaveza koja je proizašla iz Zakona o mladima („Službene novine FBiH“, broj: 36/10) posebno člana 21. koji između ostalog propisuje da će Federacija osigurati da jedno ministarstvo bude odgovorno za saradnju i koordinaciju zadataka u vezi sa mladima. Član 21. Zakona o mladima također propisuje da će Federacija u nazivu ministarstva odgovornog za saradnju i koordinaciju zadataka u vezi mladih, dodati riječi „i mladih“.

**Odredbom člana 2.** Federalni zavod za mjeriteljstvo se briše iz sastava Federalnog ministarstva energije, rudarstva i industrije kao i četvrti stav koji propisuje nadležnost tog zavoda.

**Odredbom člana 3.** je propisano da se u članu 10. stav 2. u trećem redu iza riječi „zrakoplovstvo“ stavlja tačka, a riječi „i Federalna direkcija za izgradnju, upravljanje i održavanje autocesta.“ se brišu. U istom članu je brisan i stav 4. kojim je bila propisana nadležnost Federalne direkcije za izgradnju, upravljanje i održavanje autocesta. Razlog ove izmjene je činjenica da je donesen Zakon o cestama FBiH („Službene novine FBiH“, br. 12/10 i 16/10) gdje je u članu 12. propisano da se ovim zakonom osniva Javno preduzeće Autoceste Federacije BiH d.o.o. Mostar sa sjedištem u Mostaru te je u skladu sa Odlukom Vlade FBiH o statusnim pitanjima Javno preduzeće Autoceste Federacije BiH d.o.o. Mostar V. broj: 593/10 od 01.07.2010. godine („Službene novine FBiH“, broj: 41/10) izvršen upis u Registar društava JP Autoceste Federacije BiH d.o.o. Mostar kod nadležnog suda u Mostaru. Upisom u Registar društava Federalna direkcija za izgradnju, upravljanje i održavanje autocesta prestala je da postoji kao upravna organizacija u sastavu Federalnog ministarstva prometa i komunikacija.

**Odredbom člana 4.** je propisano da se u članu 13. stav 1. mijenja. Ova izmjena je proistekla iz Inicijative Federalnog ministarstva za pitanja boraca i invalida odbrambeno-oslobodilačkog rata kojom je tražena izmjena pomenutog stava. U inicijativi se navodi „da je raniji tekst pomenutog stava dopunjen u dijelu koji se odnosi na poslove vojnih evidencija koje je ovo

ministarstvo privremeno preuzelo Uredbom o privremenom preuzimanju dijela funkcija prijašnjeg Federalnog ministarstva odbrane iz oblasti vojnih evidencija“. Izmjene ovog stava izvršene su i u dijelu koji se odnosi na izgradnju, uređenje i održavanje spomen obilježja grobalja boraca i stratišta nevinih žrtava tako što je u odnosu na raniji tekst ispred riječi izgradnju dodata riječ „pomaže“.

Isto tako postoji potreba da se Zakonom definira nadležni organ koji bi rješavao pitanja iz radno-pravnih statusa kao i pitanja pravosnažnih presuda bivših pripadnika Vojske Federacije i Federalnog ministarstva odbrane, odnosno njihovo izvršenje. Naime, tokom 2008. godine Federalnom ministarstvu pravde, po principu tzv. „negativne nadležnosti“, tadašnji Glavni ured Vlade Federacije Bosne i Hercegovine, te Sekretarijat, odnosno Generalni sekretarijat Vlade, prosljedili su na rješavanje određeni broj predmeta koji se odnose na problematiku pripadnika bivšeg FMO, odnosno VF BiH. Problematika prosljeđenih predmeta odnosila se na staž u oružanim snagama, odnosno u VF BiH, priznavanje statusa aktivnog vojnog lica VF BiH, odnosno priznavanje i uvezivanje radnog staža za određeni period, uključujući i period odbrambeno-oslobodilačkog rata 1992. godine do 1996. godine. Uglavnom se radilo o predmetima koji se, na odgovarajući način, odnose na primjenu Uredbe o sticanju prava na starosnu penziju pod povoljnijim uslovima pripadnika bivše Vojske Federacije Bosne i Hercegovine i državnih službenika i namještenika bivšeg Federalnog ministarstva odbrane ("Službene novine Federacije BiH", broj 75/06) i Uredbe o povoljnijim uslovima za sticanje prava na starosnu penziju vojnih osiguranika Vojske Federacije Bosne i Hercegovine ("Službene novine Federacije BiH", br. 18/04, 27/04 i 47/04).

Neki predmeti se odnose na izvršavanje pravomoćnih presuda nadležnih sudova koji su odlučivali o zakonitosti pojedinačnih upravnih akata bivšeg FMO po tužbama kojima su pokrenuti upravni sporovi. Presude navedenih sudova, kojima su tužbe uvažene i poništeni drugostepeni i prvostepeni akti FMO, nalažu ponavljanje upravnih postupaka, a kao stvarno nadležan organ, pozivajući se na odredbe člana 72. Zakona o odbrani Bosne i Hercegovine ("Službeni glasnik BiH", broj 88/05), te presude označavaju Vladu Federacije Bosne i Hercegovine - Komisija za koordinaciju poslova Vlade Federacije Bosne i Hercegovine iz djelokruga prijašnjeg Federalnog ministarstva odbrane. Dakle, kao stvarno nadležan organ za postupanje po navedenim presudama, u skladu sa odredbom člana 72. stav 1. Zakona o odbrani Bosne i Hercegovine, označena je Vlada Federacije.

U vezi sa navedenim na 152. sjednici Vlade Federacije održanoj 11. maja 2006. godine, donesena je Odluka o osnivanju Komisije za koordinaciju poslova Vlade Federacije Bosne i Hercegovine iz djelokruga prijašnjeg Federalnog ministarstva odbrane. Ova odluka objavljena je u "Službenim novinama Federacije BiH", broj 25/06.

Tačkom I. navedene Odluke utvrđeno je da je Komisija za koordinaciju poslova Vlade Federacije Bosne i Hercegovine radno tijelo Vlade Federacije Bosne i Hercegovine koje će djelovati do okončanja procesa tranzicije. Tačkom III. stav 1. alineja 4. i 5. Odluke utvrđeno je da Komisija razmatra i zauzima stavove te daje preporuke, mišljenja i inicijative u vezi sa pitanjima koja Vladi Federacije Bosne i Hercegovine kandidiraju privremeni stečajni upravitelj prijašnjeg FMO i resorna ministarstva i službe, a koja se, pored ostalog, odnose na radno-pravni status zaposlenika prijašnjeg FMO i VF BiH. Komisija inicira donošenje i predlaganje Vladi Federacije propisa i preduzimanje mjera i aktivnosti sukladno djelokrugu resornih federalnih ministarstava i drugih federalnih organa uprave i službi, u poslovima prijašnjeg FMO. Tačkom IV. Odluke utvrđeno je da

će Komisija u vršenju poslova iz tačke III. Odluke osigurati koordinaciju aktivnosti Vlade Federacije Bosne i Hercegovine, odnosno resornih federalnih organa uprave i službi Ministarstva odbrane Bosne i Hercegovine, putem privremenog upravitelja prijašnjeg FMO. Tačkom VI. navedene Odluke određeno je da će se obavljanje stručnih i administrativno-tehničkih poslova za potrebe Komisija, organizirati u okviru Stručne službe Vlade Federacije Bosne i Hercegovine.

Obaveze Vlade FBiH utvrđene Zakonom o odbrani BiH i Zakonom o prestanku primjene Zakona o odbrani Federacije Bosne i Hercegovine („Službene novine Federacije BiH“, broj 2/06) podrazumijevaju i poslove prikupljanja i evidentiranja u radnu knjižicu podataka relevantnih za penzijsko i invalidsko osiguranje iz tačke 1. Odluke o pravima iz penzijskog i invalidskog osiguranja i pravima iz zdravstvene zaštite pripadnika Armije BiH, HVO, odnosno VF BiH i lica angažiranih na osnovu vojne obaveze u Federalnom ministarstvu odbrane („Službene novine Federacije BiH“; broj 17/96). Obveze Vlade FBiH obuhvataju i upravno rješavanje po sudskim presudama, zahtjevima za materijalno obeštećenje zbog nezakonitog prestanka radnog odnosa u VF BiH, te rješavanja zahtjeva u vezi sa ostvarivanjem prava na penziju po povoljnijim uslovima vojnih osiguranika VF BiH.

U vezi sa predmetnom problematikom Vlada Federacije, na 162. Sjednici, donijela je Zaključke V. broj: 396/2006 od 27.07.2006. godine koji ne sadrže naznaku organa koji će preuzeti problematiku rješavanja zaostalih sudskih predmeta u upravnim sporovima koji se odnose na radno-pravni status pripadnika VF BiH, a okončavaju se (ili će se okončati) presudama kojima se poništavaju rješenja bivšeg FMO i predmeti vraćaju na ponovno postupanje.

Članom 18. stav 1. Zakona o upravnom postupku („Službene novine Federacije BiH“, br. 2/98 i 48/99, u daljem tekstu: ZUP-u) propisano je da se stvarna nadležnost određuje prema propisima kojima se uređuje određena upravna oblast ili po propisima kojima se uređuje nadležnost pojedinih organa uprave. Nadležnost je pravo i obaveza nekog organa da postupa u određenoj upravnoj stvari, odnosno da donese rješenje kojim odlučuje o toj stvari. Člankom 20. ZUP-u propisano je da nijedan organ ne može preuzeti određenu upravnu stvar iz nadležnosti drugog organa i sam je riješiti osim ako je to zakonom predviđeno i pod uslovima propisanim tim zakonom. Istovremeno, organ nadležan za rješavanje u određenoj upravnoj stvari može samo na osnovu izričitog zakonskog ovlaštenja prenijeti rješavanje u određenoj upravnoj stvari na drugi organ. Stavom 3. člana 20. ZUP-u izričito je propisano da se stvarna nadležnost ne može mijenjati dogovorom stranaka, dogovorom organa i stranaka, kao ni dogovorom organa, osim ako je to Zakonom drukčije uređeno.

Princip tzv. „negativne nadležnosti“ prema kojem su neriješeni predmeti prijašnjeg FMO, odnosno VF BiH proslijeđeni na rješavanje Federalnom ministarstvu pravde ne može se primijeniti za te predmete jer je članom 19. stav 5. ZUP-u predviđeno da se, u slučaju nejasnoće u propisima, nadležnost za postupanje utvrđuje prema prirodi stvari, pa tek onda po principu „negativne nadležnosti“.

S obzirom da je Federalno ministarstvo za pitanja boraca i invalida odbrambeno-oslobodilačkog rata preuzelo odgovarajući kadar prijašnjeg FMO, odnosno VF BiH koji je osposobljen za rješavanje problematike koja je predmet izmjena i dopuna Zakona o federalnim ministarstvima i drugim tijelima federalne uprave, te da je navedeni kadar upoznat s stanjem arhivske građe, proizilazi da je opravdano i pragmatično da taj kadar u okviru Federalnog ministarstva za pitanja boraca i invalida odbrambeno-oslobodilačkog rata dovrši posao i zadatke koji su ostali neriješeni neadekvatnim propisima kojim je izvršena tranzicija entitetske vojske na državni nivo.



Predloženom dopunom Zakona o federalnim ministarstvima i drugim tijelima federalne uprave konačno bi bio prevaziđen *vakuum* stvoren naprijed navedenim nedostacima prelaznih odredbi propisa kojima je izvršena tranzicija entitetske vojske, odnosno ukinuto FMO i VF BiH. Isto tako, pitanje nadležnog organa za upravljanje vojno-stambenim fondom je do sada rješavano uredbama, zaključcima i odlukama Vlade, te postoji potreba da se ta materija zakonski regulira odnosno da se Zakonom propiše nadležnost Federalnog ministarstva za pitanja boraca i invalida odbrambeno-oslobodilačkog rata koje bi po prirodi stvari trebalo biti nadležno za ta pitanja.

**Odredbom člana 5.** je propisano da se u članu 16. stav 1. mijenja, te se u stavu 2. riječi: „Federalnog ministarstva kulture i sporta“ zamjenjuju riječima: „Federalnog ministarstva kulture, sporta i mladih“. Ova izmjena je proistekla iz Inicijative Federalnog ministarstva kulture i sporta kako je navedeno u Obrazloženju za član 1.

**Odredbom člana 6.** je propisano da se u članu 18. dodaje novi stav kojim se u sastavu Federalnog ministarstva prostornog uređenja formira Zavod za prostorno planiranje Federacije BiH. Formiranjem Zavoda bi se omogućio kontinuitet u izradi planskih dokumenata kao i paralelna izrada više planskih dokumenata. Pored navedenog Zavod bi se bavio i aktivnostima istraživačkog karaktera. Također bi se osiguralo izbjegavanje diskontinuiteta u izradi plana kada su u pitanju nosioci izrade plana „tržišnog karaktera“, što ima za posljedicu problem stalnog monitoringa nad strukturom stručnog tima nosioca izrade plana. Isto tako formiranjem Zavoda izbjegli bi se problemi oko produžavanja bankovnih garancija koje osigurava nosilac izrade plana.

**Odredbama članova 7., 8. i 9.** se propisuje pozicioniranje Federalnog zavoda za mjeriteljstvo u sklopu samostalnih upravnih organizacija te se propisuje djelokrug rada pomenutog Zavoda.

Napominjemo da za ovakav novi status ovog zavoda nisu potrebna dodatna finansijska sredstva jer će se sredstva iz Budžeta Federalnog ministarstva energije, rudarstva i industrije proporcionalno umanjiti i prenijeti na novoformiranu instituciju koja je i dosad postojala samo u sastavu pomenutog ministarstva.

**Odredbom člana 10.** je propisano je stupanje na snagu Zakona.

#### **IV. - SREDSTVA ZA PROVOĐENJE**

Za provođenje ovog zakona potrebno je osigurati određena sredstva u Budžetu Federacije Bosne i Hercegovine čiju visinu u ovom momentu nije moguće odrediti.

**Odredbe Zakona o federalnim ministarstvima i drugim tijelima federalne uprave**  
**("Službene novine Federacije BiH", br. 58/02, 19/03, 38/05, 2/06, 8/06, 61/06, 52/09 i 48/11)**  
**koje se mijenjaju:**

**II. - FEDERALNA MINISTARSTVA, FEDERALNE UPRAVE I FEDERALNE UPRAVNE ORGANIZACIJE**

**1. Federalna ministarstva**

**Član 4.**

Federalna ministarstva su:

1. Federalno ministarstvo unutrašnjih poslova - Federalno ministarstvo unutarnjih poslova,
2. Federalno ministarstvo pravde,
3. Federalno ministarstvo finansija - Federalno ministarstvo financija,
4. Federalno ministarstvo energije, rudarstva i industrije,
5. Federalno ministarstvo prometa i komunikacija,
6. Federalno ministarstvo rada i socijalne politike,
7. Federalno ministarstvo raseljenih osoba i izbjeglica,
8. Federalno ministarstvo za pitanja boraca i invalida odbrambeno-oslobodilačkog rata - Federalno ministarstvo za pitanja branitelja i invalida domovinskog rata,
9. Federalno ministarstvo zdravstva,
10. Federalno ministarstvo obrazovanja i nauke,
11. Federalno ministarstvo kulture i sporta,
12. Federalno ministarstvo trgovine,
13. Federalno ministarstvo prostornog uređenja,
14. Federalno ministarstvo poljoprivrede, vodoprivrede i šumarstva,
15. Federalno ministarstvo razvoja, poduzetništva i obrta,
16. Federalno ministarstvo okoliša i turizma.

**Član 9. stav 2.**

U sastavu Federalnog ministarstva energije, rudarstva i industrije je Zavod za mjeriteljstvo i Federalna direkcija za namjensku industriju.

**Član 10.**

Federalno ministarstvo prometa i komunikacija vrši upravne, stručne i druge poslove utvrđene Zakonom koji se odnose na ostvarivanje nadležnosti Federacije u oblasti prometa i komunikacija, i to: cestovni promet i javne ceste, željeznički, zračni, pomorski, riječni i jezerski promet; cjevovodni promet; sigurnost cestovnog, željezničkog, zračnog, pomorskog, riječnog i jezerskog prometa; kontrolu letenja; telekomunikacije i poštu osim uspostave i funkcioniranja zajedničkih i međunarodnih komunikacijskih uređaja i vrši druge poslove utvrđene Zakonom.

U sastavu Federalnog ministarstva prometa i komunikacija je Federalna direkcija za civilnu avijaciju - Federalna direkcija za civilno zrakoplovstvo i Federalna direkcija za izgradnju, upravljanje i održavanje autocesta.

Federalna direkcija za civilnu avijaciju - Federalna direkcija za civilno zrakoplovstvo obavlja stručne i druge poslove iz nadležnosti Federacije koji se odnose na: planiranje, koordinaciju i razvoj, standardizaciju i održavanje kapaciteta objekata u zračnim lukama i opreme, opreme kontrole leta i zrakoplovnih sredstava, obavljanje koordinacije zračnih prijevoznika, strategiju civilnog zrakoplovstva, aeronautičnu inspekciju, dozvole za letenje, rukovođenje i statistiku zračnih luka, sigurnost letenja, aeronavigaciju, spasilačku službu, prijem i predaju poruka, te obuku i razvoj kadrova kroz odgovarajuće institucije i preduzeća iz oblasti zračnog prometa.

Federalna direkcija za izgradnju, upravljanje i održavanje autocesta vrši stručne i druge poslove iz nadležnosti Federacije koji se odnose na: finansijski inženjering, pripremu, organizaciju i vođenje izgradnje cesta visokog nivoa služnosti (autocesta, poluautocesta i brzih cesta); koordinaciju i sprovedbu preuzetih obaveza u definiranju i izgradnji cestovnog koridora (Vc i drugih koridora); pripremu dugoročnog i srednjoročnog plana razvoja autocesta u Federaciji; izradu projektnih zadataka za izgradnju autocesta u Federaciji; pripremu investicijsko-tehničke dokumentacije; pripremu, definiranje i izradu tenderske dokumentacije; pripremu uslova za izgradnju autocesta; izradu planova i mjera za prometnu sigurnost izgradnje autocesta; praćenje izvršenja građevinskih poslova sukladno dinamičkim planovima i vrši i druge poslove u svezi s izgradnjom autocesta, a koji se naročito odnose na: pripremu projektne dokumentacije (tehničke provjere različitih varijanti prostiranja trase u prostoru i usklađivanje među ministarstvima, općinama i vlasnicima objekata i zemljišta, izrada studija i idejnih projekata, priprema lokacijskih crteža i sl.); pribavljanje lokacijskih dozvola, građevinskih dozvola i upotrebnih dozvola za ceste visokog nivoa služnosti i cestovne objekte; otkup zemljišta i objekata; plaćanje odšteta i drugih troškova u vezi sa pripremom gradnje; organiziranje finansiranja izgradnje cesta visokog nivoa služnosti (kontakti s međunarodnim finansijskim institucijama, priprema podloge za pripremu i dodjelu koncesije i dr.); pripremu dokumenata ponude i ustupanje radova izgradnje cesta visoke razine služnosti i cestovnih objekata; organizaciju stručnog nadzora i kontrolu izgradnje; organizaciju tehničkog pregleda i primopredaje cesta visoke razine služnosti te dijelova ovih cesta na korištenje i održavanje.

### **Član 13.**

Federalno ministarstvo za pitanja boraca i invalida odbrambeno-oslobodilačkog rata - Federalno ministarstvo za pitanja branitelja i invalida domovinskog rata vrši upravne, stručne i druge poslove utvrđene Zakonom koji se odnosi na: utvrđivanje jedinstvene politike i pripremanje sistemskih propisa kojim se reguliraju osnovna socijalno-statusna pitanja vojnih invalida, porodica poginulih boraca i nezaposlenih boraca i boraca drugih oslobodilačkih ratova i učesnika oslobodilačkih pokreta i zaštitu ratnih i mirnodopskih vojnih invalida, zaštitu članova porodica poginulih, nestalih i umrlih boraca, kao i umrlih ratnih i umrlih vojnih invalida; upravni i finansijski nadzor izvršavanja zakona i drugih propisa iz oblasti boračko-invalidske zaštite u skladu sa Ustavom i Zakonom; daje mišljenja na propise koje pripremaju drugi organi, a odnose se na socijalno-statusna prava ovih kategorija; osiguravanje sredstava za finansiranje prava propisanih federalnim zakonima i drugim federalnim propisima; utvrđuje načine isplate i usklađivanje mjesečnih novčanih primanja; izgradnju, uređenje i održavanje spomen-obilježja, grobalja boraca i stratišta nevinih žrtava; kontrolu namjenskog trošenja sredstava i vođenje propisanih evidencija iz nadležnosti ovog ministarstva.

Borcima, ratnim invalidima i mirnodopskim vojnim invalidima iz stava 1. ovog člana podrazumijevaju se dosadašnji pripadnici Armije Republike Bosne i Hercegovine, pripadnici HVO i policije, kao i borci NOR-a od 1941. do 1945. godine.

Pod mirnodopskim invalidima podrazumijevaju se vojni invalidi koji su taj status stekli prilikom služenja obaveznog vojnog roka u miru.

### **Član 16.**

Federalno ministarstvo kulture i sporta obavlja upravne, stručne i druge poslove iz nadležnosti Federacije koji se odnose na koordinaciju u naučno-istraživačkoj djelatnosti iz oblasti zaštite i korištenja kulturno-historijskog naslijeđa, muzejskoj, arhivskoj, bibliotekarskoj, izdavačkoj, pozorišnoj, likovnoj i filmskoj djelatnosti, djelatnosti ustanova, udruženja, fondacija i drugih pravnih lica u oblasti umjetnosti, kulture, sporta i mladih, unapređivanju djelatnosti iz oblasti kulture, sporta i mladih, kao i druge poslove utvrđene zakonom.

U sastavu Federalnog ministarstva kulture i sporta je Zavod za zaštitu spomenika.

Zavod za zaštitu spomenika obavlja stručne i druge poslove koji pretežno zahtijevaju primjenu stručnih, naučnih i kreativnih metoda rada i s njima povezanih upravnih poslova u oblasti zaštite i korištenja kulturno-historijskog nasljeđa, istražuje, proučava, dokumentira i obrađuje prikupljene podatke, valorizira i štiti evidentirane objekte kulturno-historijskog nasljeđa, izrađuje sve propisane i standardizirane programe zaštite i korištenja objekata kulturno-historijskog nasljeđa, arhivira i čuva dokumentaciju o objektima kulturno-historijskog nasljeđa, utvrđuje mjere i uslove za buduću namjenu, korištenje i upravljanje objektima kulturno-historijskog nasljeđa, priprema programe sanacije, konzervacije, restauracije, rekonstrukcije i rehabilitacije objekata kulturno-historijskog nasljeđa, vrši nadzor nad realizacijom programa i projekata zaštite i korištenja objekata kulturno-historijskog nasljeđa, daje mišljenje na programe i projekte zaštite i korištenja objekata kulturno-historijskog nasljeđa izrađene od drugih fizičkih i pravnih lica, učestvuje u izradi zakona i drugih propisa u vezi sa zaštitom i korištenjem kulturno-historijskog nasljeđa, obavlja i druge poslove iz oblasti zaštite i korištenja kulturno-historijskog nasljeđa utvrđene Zakonom i drugim propisima.

### **3. Samostalne federalne upravne organizacije**

#### **Član 24.**

Samostalne federalne upravne organizacije su:

1. Federalni zavod za statistiku,
2. Federalni hidrometeorološki zavod,
3. Arhiv Federacije,
4. Federalni zavod za programiranje razvoja i
5. Federalna direkcija robnih rezervi.
6. Federalni zavod za agropedologiju,
7. Federalni zavod za poljoprivredu Sarajevo,
8. Federalni agromediteranski zavod Mostar,
9. Federalni zavod za geologiju.

Upravne organizacije iz stava 1. ovoga člana imaju svojstvo pravnog lica, ako posebnim Zakonom nije drukčije određeno.